

燕兰小谱

吴长元

文硕阁

wenshuoge.com

目录

关于我们	3
○ 《燕兰小谱》弁言	5
○ 《燕兰小谱》题词	6
○ 《燕兰小谱》例言	7
● 燕兰小谱卷之一	8
● 燕兰小谱卷之二	15
● 燕兰小谱卷之三	21
● 燕兰小谱卷之四	27
● 燕兰小谱卷之五	33
● 《燕兰小谱》跋	40

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

○《燕兰小谱》弁言

《燕兰传》记燕姑梦兰曰：『兰有国香，人服媚之，是兰之气韵，无分乎南北也。』癸卯中夏，王郎湘云素善墨兰，因写数枝于折扇，一时同人赓和，以志韵事。余逸兴未已，更征诸伶之佳者，为《燕兰小谱》。始甲午迄今，共得六十四人，计诗百三十八首。又杂咏、佚事、传闻，共五十首。先之以画兰诗者，识原始也。继之以燕兰谱者，美诸伶也。终之以杂咏者，寓规讽也。诸伶之妍媚，皆品题于歌馆，资其色相，助我化工，或赞美，或调笑，或即剧传神，或因情致慨，其优劣略见于小叙中，而诗不沾沾于一律，大约风、比、兴三义为多。嗟乎！昔人识艳之书，如《南部烟花录》、《北里志》、《青泥莲花记》，《板桥杂记》，及赵秋谷之《海沔小谱》，皆女伎而非男优。即黄雪蓑《青楼集》所载，亦女旦也。惟陈同倩《优童志》见其《齐志斋集》中，惜名不雅驯，为通人所诮。《燕兰谱》之作，可谓一时创见，然非京邑繁华，不能如此荟萃，太平风景，良可思矣。后之继咏者当不乏人。余何惮投燕石而引夫宋玉也耶！

乾隆乙巳季秋安乐山樵太初自识

○《燕兰小谱》题词

西风木叶，萧然摇落之晨；鸟帽黄尘，老矣羈孤之客。看堂堂之去日，白发霜凝；闻略略之新声，青楼梦断。于无聊赖之中，作有情痴之语。嬉笑怒骂，着为文章；钏动花飞，通于梵乘。征声角伎，偶同竿木以逢场；舞榭歌台，都供水天之闲话。此安乐山樵《燕兰小谱》之所由作也。山樵长湖山郡，住癸辛街，家世翩翩，性情落落，身留燕市，不求闻达而来。仆是吴侬，未识裙裾之乐，欲醒看书之眼，频上查楼；聊分问字之金，闲亲鞦韆部。玩游既数，题品斯真，阅历恒多，长言不足。人萃齐晋燕秦，蜀滇吴楚，如游羣玉之山；技兼琴棋文酒，书翰管弦，若过五都之市。于是抽毫纪丽，骋秘图妍。凡兹载弁之钗，媵以有声之画。闲花野草，都归贮药笼中；黠鼠淫狐，莫遁照妖镜里。雅花列部，协正变于风人；正杂分编，配阴阳于易象。个个香浓语媚，郤从尘外观尘；篇篇棒喝铃提，不向梦中说梦。如填花品，搜罗适合仙班；葛宏《列仙传》仿《列女传》之例，皆七十二人。今谱中花雅部以讠杂咏所载，亦如其数。试数流光，历览恰周星纪。花雅部所载，断自甲午至今，凡十二年。朱竹垞《风怀》二百韵，斗巧争妍；陈老莲《水浒》四十人，穷形尽相。可谓笔有生枯，意含美刺者矣！然而此其略也，窃有疑焉。黄金台畔，不栽燕姑之花；秋草丛中，孰采灵均之佩。顾斯名而安在，宁无说以征之。则有人来紫盖，巷本乌衣，称名而影满冰轮，问字知气蒸梦泽。韶年婬约，歌残杨柳之风；雁序娉婷，拆破琵琶之字。媚香楼上，邀龙友之新题；水绘园中，喜云郎之乍见。而乃舞衫才卸，翠墨裁笺；檀板初停，牙签读画。家有右军之沼，水被鱼吞；手挥左氏之香，毫真蕊结。枝枝带露，□争没骨之图；叶叶翻风，题满聚头之扇。此嘉名因之缘起，而小谱于以权舆也。嗟乎！帝京景物，美丽偏饶，盛世笙簧，臣民溥乐。流连光景，原达者之襟期；歌咏升平，洵才人之韵事。今日旗亭画壁，不减西昆，他年日下征闻，应夸南部。倘谓王逸少遣哀乐于中年，诚知我者；如曰杜工部咏雨云于巫峡，亶其然乎！

乾隆岁次乙巳初冬望日西塍外史漫书

○《燕兰小谱》例言

一、是谱始于癸亥，成于乙卯。诸伶所在某部，据作诗时书之。嗣后更易，未暇改正。至名字、籍贯，惟著者得其详悉，余约略而已。

一、元时院本，凡旦色之涂抹、科诨、取妍者为花，不傅粉而工歌唱者为正，即唐雅乐部之意也。今以弋腔、梆子等曰花部，昆腔曰雅部，使彼此擅长，各不相掩。

一、诸伶叙次，惟部首数人略有轩轻，此下皆随意编录，无定见也。其殿末一人颇深注意，不可漠视孙山，

一、魏长生开近年风气，序中颇致讥词，然曲艺之佳，实超时辈。今独昆腔，声容真切，感人欲涕，洵是歌坛老斲轮也，不与吟等为伍，置诸殿末，庶几齐变于鲁，为王刘赤帜。

一、陈、王、二刘，时称四美，以冠花部，允协輿情。若白二之歌喉，永亭之态度，洵梨园名辈，置于次卷之首，不忍没之。

一、雅旦非北人所喜。吴、时二伶兼习梆子等腔，列于部首，从时好也。发官为殿，其曲终奏雅欤！

一、画兰诗为谱之原始，杂咏、杂感为谱之余韵，故编于首末。

一、谱中评品，皆得于歌馆，藉粉饰以供吟咏。若不钁而弁，恐白面郎无几，宁有子都耶？读者求之于风鬟雾鬓间，庶其似之矣！

●燕兰小谱卷之一

西湖安乐山樵吟

○画兰诗共五十四首，词共三首

夫兰，国香也；画，韵事也；湘云，伶中之彼美也。美人芳草，臭味相同。画意诗情，唱酬胥协。爰以冠首，并附同人。

王郎湘云，虽隶乐部，颇嗜风雅，歌板之余，寄情笔墨，尝写兰扇贻少施氏，楚楚可爱。兰修为题诗四章。西宾张润斋和焉，索余同咏，为赋四断句以志韵事。

墨池潇洒写同心，彩笔拈来胜断金。一片湘云萦澧水，王郎从此播芳音。

弱腕能将粉本描，聚头习习逞风标。虾皮韭菜撩情思，惭愧乌盆郑板桥。

某巨公戏题湘云画兰云：『韭菜虾皮乱一丛』，讥初学之花叶相似也。郑板桥自题《破盆兰》云：『早知不入时人眼，打破乌盆更入山』，以喻巨公。

庾、鲍才华不自持，媚香入画更题诗。西园公子空萧索，春水无端皱一池。

杨龙友为妓李贞丽画兰，妆阁名『媚香楼』。

自叹幽芳涧谷生，出山犹是在山情。倪迂惯作无根画，沦落天涯臭味生

○题湘云墨兰

喜见王郎试笔频，斜风丝雨不胜春。若教渐入芝兰室，只恐孤他海上人。王荆公书，如斜风丝雨。

丝纶妙手补天衣，燕寝凝香客见稀。擗管忽收娇弟子，兰英新吐蕙苗肥。

○友人以王郎兰扇索题，为书一绝

帙展南田仿效工，不将浓艳染东风。亭亭小阁乌皮儿，间写湘兰一两丛。

少施氏赠湘云《恽南田画册》，湘云日仿兰竹与菜，不事采色。

○有学画兰者，伪署湘云名款索题

纵横薤韭任披纷，强作潇湘九畹云。寄语墙东君莫妬，米颠今又效羊欣。湘云仿兰修，如婢学夫人，今又假湘云，是薛绍彭之讥米颠为重僇矣。

湘云画兰一载，浓淡疏密，颇有法度，间布拳石，亦清雅不俗，署名数字拙而媚。友人以画扇索题，为缀数语识之。

嫩叶纷披瘦蕊埋，香风散自粉坊街。王郎妙腕无人识，两字书名似折钗。

湘云居南城虎坊桥西粉房琉璃街。

歌传檀板按梁溪，羞作南音唱大堤。兰韵已回燕谷暖，痴情宁共楚云迷。

湘云近习昆曲，颇佳。

今夏居停移寓果子巷西，湘云继亦迁至，相与为邻。友人屡以扇属余索湘云画兰，戏题簞上。

岂是燕兰韵语工，王昌今又住墙东。先生自有春风笔，太极圈儿万象融。

友人见《燕兰谱》，疑余为钟情湘云者，诂知其未识也。

○题湘云兰扇

风寒翠叶姿偏嫩，露浥檀花笑未开。好似行云巫岫女，乱头粗服返阳台。

○南乡子题湘云墨兰

清影古幽芳，翠叶披披嫩蕊黄。堪与江梅同寄傲，潇湘有客，行吟祇自伤。

乡思意难忘，写入云笺韵更长。欲向燕台频结契，王昌到处，逢人是媚香。

○附同人作随意钞录，未识姓名。

○为耦堂题湘云画兰

一朵含风态崭新，枝枝叶叶淡无垠。品题忽忆东坡老，曾说春兰似美人。

似浓如淡不曾匀，欲整还斜太逼真。郗笑羊欣好书格，被人强说学夫人。

九畹湘皋旧结邻，灵根元是此花身。自从楚客纫秋佩，不共蘼芜感弃人。
密蕊檀花不染尘，风来馥郁静含春。离离绕砌看都好，渠是乌衣巷里人。
仆题湘云墨兰屡矣，风枝露叶，数见不鲜。今耦堂以画箴索句，姑以卽事题之。
风寒翠带影离披，犹是潇湘雨后姿。想得晴窗闲弄墨，一双条脱拂笺时。
登登新起燕泥梁，室有图书研壁光。他日从余乞题榜，也应唤作媚香堂。

○题湘云兰扇为郑定斋作

偶从楚艳结幽姿，郤被东风日夜吹。移向庭前比书带，清芬还散授经帷。
乱头粗服看俱好，笔势翩翩整复斜。记否一枝曾入梦，国香原属使君家。

○为藕塘题兰扇

韞材堆几画盈床，消受炉烟茗椀香。不到粉坊街上住，那知天壤有王郎。
契比兰盟与石交，风流真使意都消。舆台郤笑闲桃李，不是魂挑便目招。
藕塘属湘云画兰自制小印赠之。

○长相思题湘云画兰

湘水清，湘月明，淡淡湘烟霭霭云，中含一段春。花素心，人素心，一样幽姿一样馨，同心应共盟。

湘云墨兰便面流播歌场，笔法娟秀，艺林赏之。适于韵湖斋中见太初、润斋两君题词，更为王郎生色也。未忘积习，偶触闲情，爰题五绝句，以志一时雅胜。

题遍旗亭忆往时，双鬟惯唱白云词。忤除绮业原非易，又和东曹小史诗。

张季鹰《咏小史诗》最为绮缦，以况□斋。

湘波缥缈正愁予，素质盈盈绘不如。谁染银毫摹粉本，恍疑九畹乍移居。
云弹双肩月堕怀，春兰秋蕙两相谐。乌衣子弟多佳客，裙屐翩翩款画斋。

画中緘恨最难抛，扇影桃花为解嘲。输与文孙弄柔翰，太初著作手频钞。

太初『春水无端皱一池』，韵湖击节不置。文字之契，洵非偶然。

兰生幽谷閼芳姿，不似杨枝与柳枝。倘向云蓝窥姓氏，阿侬家世本王篱。

○太初居士以所题湘云墨兰同玩，戏成三首

湘烟为态雨为神，写出幽丛力未匀。闲向吴兴窥墨法，风姿诘逊管夫人。

往事风流竞占名，江梅百咏太钟情。陈髯枉诧云郎貌，弱腕何曾解写生。

用陈检讨与紫云事。

楚天清露晓来多，云展春山黛色拖。好是江乡芳泽远，飞飞翠羽水如罗。

○为藕塘书湘云兰扇

金台才子江郎笔，赋罢亲书幼妇词。欲向兰心通雅契，先从云叶寄相思。

猗猗九畹漫含情，爱尔欹斜小署名。想得竹萌兼菜甲，轩窗风味擅三清。

湘云近仿南田老人竹菜。余谓并写一幅，可称《三清图》矣。

○题湘云墨兰簞子

帘栊昼清润，佳客时在傍。柔荑拈弱管，墨渾流清光。相对愜素心，不言而自芳。出入君怀袖，挹此幽谷香。

○戏题王郎画扇

燕姑梦传佳兆，罗含宅绘芳丛。緑雨能遮夏日，媚香羣挹春风。

昔人以梔为緑雨

○题湘云貽兰修居士、梅道人竹卷及所画兰

美人携妙迹，娇语何諠諠。欲乞沔波笔，赠以梅花庵。轴展媚余香，瞥见鸾停骖。宛临潇湘浦，中有翠雨涵。闻当憇息时，纷披画元蚕。兼学画竹即如此幅画，妙腕

犹能参。叶长既婀娜。萼芳仍清酣。灵心疑独秉，歌音胜何戡。

○题湘云墨兰

莫言帘幕已秋风，春色无端入蕙丛。昨夜月明鹦鹉语，只疑香影贴堂东。

怪底人称竞体芳，声名端欲胜云郎。从教檀板金樽误，方寸长怀九畹香。

○为友人题湘云兰扇

绮石黄蘖画作殊，离披清影映屠苏。梨园会有彭郎指，挑拨清圆似此无。彭万官工琴

仙史丹青擅一时，临摹粉本费寻思。高怀羞学长安妓，夸诵当年白傅诗。

○清平乐赠湘云画兰

闲时挥洒，叶叶翻书带。松雪丰神差领会，一种柔情堪爱。新笺帖近兰寮，春寒翠影描条。添入袁安卧处，风光宁减红蕉。

○题王湘云墨兰

洒落芳姿别有神，香风习习研池春。依希露裊烟汀晓，影入湘潭自写真。

○有以湘云兰扇索题者，为赋长律一首

清雅王郎玉不如，齐纨轻拂晓窗虚。花因露重檀心掩，叶被风拏翠带舒。芳性可纫君子佩，媚香还袭美人裾。而今画史添佳话，小署双名钗股书。

○题王郎兰墨便面

乐部檀郎笔，江皋美女花。清风时拂袖，香梦落谁家？

○同作

赤日行堪畏，凉飈爽欲馨。郢疑湘月下，解佩见娉婷。

○题湘云墨兰

春风习习洒清辉，芳韵嫣然不厌肥。恰似晚凉新浴后，花前笑舞蝶绡衣。

湘云写兰多作丛，叶花极浓郁有致。

○友人写兰，伪署湘云名款，索题，赋小诗一绝

茶熟香温墨未干，画成？拟秀堪餐。输他婀娜撩情思，露叶风枝总耐看。

○题湘云画兰

奁水沈香耐露寒，无边春色上毫端。如何南浦云深处，不画湘妃竹数竿。

应是春寒箭未多，纷纷翠影郁婆娑。曲江士女如相见，为问金钱掷几何？

○题湘云兰石扇头

焦墨□褙乱点苔，数茎含蕊倚风开。堪嗟湘女凌波袜，瓦砾堆中小舞来。昔人谓名家书折扇，如美女舞于瓦砾堆。今湘云兰石似之。

○湘云兰扇二绝

三楚精神雅擅名，谱中纤影现娉婷。更怜数笔娇含露，争得心如宋广平。

春雨春风态度多，离骚芳意日摩娑。笑他麝笔今频见，讵独当年襋帖讹。

○王郎湘云意态闲远，不与众伍，所画墨兰楚楚有致，为制《采兰曲》四首，写其人以题其画

灼灼韶华子，采兰湘水滨。叶长自容与，花好相鲜新。

采兰莫采叶，叶劲似依心。贾客漫行乐，兰言胜断金。

朝采湘江头，暮采湘江曲。湘江风月清，爱他鸥鹭宿。

行行逢伴侣，相逐兰皋上。同伴不同心，彼此殊声响。

○题湘云兰扇

数茎叶，春在手；君子心，美人口。

○王郎墨兰漫书二絕

春风偶逗墨池香，不许湘兰旧擅场。真个丹青能养目，何须更借美人光。

入乘青翰来云梦，天与灵心写国香。博得孙郎七字句，未输绮语赋清芳。

上二语，孙某赠湘云联句也。

题湘云画兰

芳佩澧兰沅芷，清姿畹露湘云。桃李漫山都俗，国香独有夫君。

《燕兰小谱》卷之一终

●燕兰小谱卷之二

西湖安乐山樵吟

余咏画兰诗后，艳情绮语，触绪纷来，俯仰兴怀，不能自禁。爰取甲午至今都中旦色之得名者，凡若干人，或存或亡，所闻所见，悉为题咏。各志数语，品评以覘大概。而余子碌碌，等之自衿以下云。

自题二絕句

百册新词缓缓讴，等闲罪过属风流。太平英彦多骚雅，愧我迂疏半白头。

南北伶伦妙一时，皇州风景系情思。定知传唱燕兰句，陋彼昌符婢仆诗。

唐李昌符久居长安，作《婢仆诗》五十首，皆中有所讳，一时盛传都下。

花部一十八人，计诗四十六首

陈银官宜庆部，字溪碧，四川成都人，魏长生之徒。明艳韶美，短小精敏。庚辛间与长生在双庆部，观者如饱饫醲鲜，得青子含酸，颇饶回味，一时有出蓝之誉。嗣后闺妆健服，色色可人。其机趣如鱼戏水，触处生波。僂巧似猱升木，灵幻莫测。余见其《烤火》一剧，顿解易象。闻吾乡沈君作诗十二首赏之，恐读渔洋秋柳诗，知其妙而未必能名也。今以银官为巨擘，惜乎交尽金失，苦羞涩者但目逆而送之耳。

逸态翩跹青胜蓝，多情不作宝儿憨。怜他酝藉春风里，弱柳依依似汉南。

娇小僂翻巧则那，诙谐成趣惬心多。几回注目怡情处，道好声难唤奈何。

北人观剧，凡惬意处高声叫好，此非我辈所能。

西州佳丽最堪思，怪尔风流擅一时。巫字山临巴字水，柳枝人唱竹枝词。

季子多金谊目连，五陵裘马态翩翩。饶伊杜牧风情远，名士由来值几钱慨沈君也。

王桂官萃庆部，名桂山，即湘云也，湖北沔阳州人。身材彷彿银儿。横波流睇，柔媚动人，一时声誉与之相埒。余谓『银儿如芍药，桂儿似海棠。其丰韵嫣然，常有出于浓艳凝香之外，此中难索解人也。』为少施氏所赏，赠书画、玩好，千有余金。故矫矫自爱，屡欲脱屣尘俗，知其契合不在形骸矣！

丰韵嫣然一笑间，湘云冉冉锁巫山。襄王不赴高唐梦，莫放春风作等闲。

风俗荆江乐事多，春田土鼓唱秧歌。何来窄袖青衫女，笑眼看钱卖饴饠。演《卖饴饠》一出甚佳。

身小□绵似李娃，媚香叶叶向人夸。如何九畹湘兰秀，不解藏娇是二麻。

漫说纤腰舞翠盘，昵人娇态步蹒跚。《欠伸图》好从儿学，一种春情有两般。

少施所藏《欠伸美人图》，甚自珍惜，为湘云乞去。

刘二官萃庆部，名玉，字芸阁，云南安宁州人。长身玉立，逸致翩翩，一时王、刘齐名。然刘之美不似王之易见。《硕人》之二章曰：『手如柔荑，肤如凝脂，领如蝤蛴。』非善咏美人者不能细心体状。而刘郎兼有之，性颇骄蹇，与豪客时有抵牾。近有太岳之裔，寒士也，以绮语结契，甚相爱重，岂少陵所云：文章神交有道乎？

虢国风流别有春，每嫌脂粉污天真。卯金故事堪持誉，帐里盈盈两玉人。昭烈帝甘夫人事

一剧传摹女悦男，晴丝袅袅吐春蚕。邠伶南国生刘二，不似西州熟魏三。芸阁仿婉卿《缝格膊》一则，终逊自然。宋魏野赠妓诗：『君为北道生张八，我是西州熟魏三。』

臭味甘和似醴醪，无端作恶愤余桃。多情丁卯桥边客，力任调人不惮劳。

白傅歌词入诵难，顿教声价重长安。而今好向人夸诩，博得文园赋藻看。

刘凤官萃庆部，名德辉，字桐花，湖南郴州人。丰姿秀朗，意态□绵，歌喉宛如雏凤，自幼驰声两粤。癸卯冬，自粤西入京，一出歌台，即时名重，所谓：『飞上九天歌一声，二十五郎吹管逐』，如见念奴梨园独步时也。都下翕然以魏婉卿下一人相推，洵非虚誉。是日演《三英记》，无淫滥气象，惜关目稍疏，即剧调之。

流水行云兴若何，相逢无那逗情波。娉婷邠胜如花女，不事施朱着粉多。

帝里新夸艳冶名，粤西声誉早铮铮。王湘云陈

湊碧刘

芸阁郑

兰生超时辈，独许几家继婉卿。

一剧张三认老婆，笑嬉怒骂尽都卢。卯金迁客欣相赏，直把文情拟大苏。

乍订鸾俦意已谐，反共作合巧安排。怜伊未遂同衾愿，豕肉何时补缝来。尝见演《三英记》，乃唐将王士英败至窦庄，窦老将女桂英与成亲。后女寇高兰英追至，桂英计醉以酒，为之撮合。今凤官扮桂英，未成亲而先使二人谐好，是黄花女作媒矣。因忆小说中吴汝玉与所欢凤姨相谑，举物视之，凤曰：『豕肉耳。』吴曰：『非此何由补缝』之语以调之○『豕肉』，吴音同汝玉；『缝』，谐音凤。

郑三官保和武部，名载兴，字兰生，江苏吴县人，昆曲中之花旦也。癸卯冬入京，虽近而立之年，淫冶妖娆如壮妓欢迎，令人酣悦。台下好声鸦乱不减婉卿。初至时，尝演《吃醋》《打门》，摹写姑妇春情褻语，觉委鬼之《滚楼》不过阳台幻景，未若是之既雌亦荡也。惜豪客难逢，徒供酸丁饿眼，以身发财岂易言欤？

谑浪风流妙一时，好声频送笑情痴。可怜误入梁溪队，空作花枝照酒卮。昆曲非北人所喜。故无豪客，但为乡人作酒纠而已。

东吴西蜀两妖娆，摹写春闺故故娇。莫问楼头疑雨态，妬情终是可怜宵。

吴下传来补破缸，低低打打柳枝腔。庭槐何与风流种，动是人间王大娘。是日演《王大娘补缸》，杂剧中如《看灯》《吊孝》《卖胭脂》《骂鸡》，何王氏之多佳话耶！

约束登场态欲仙，玉奴弓样倍增妍。凭谁消受乌鞞暖，冬去春来又一年。有允兰生暖靴过冬者，竟属子虚，诗以嘲之。

彭万官宜庆部，字庆莲，四川万县人。工琴，大目浓眉，爽朗可爱，不似唱『杨柳岸晓风残月』女郎，故名擅歌楼，毁者几半。有时演小生，更觉风情洒落，机畅神流。兰修深赏之。去年随浣花公往楚，未入品题。今见其丰度与芸阁平泰，可称庐前王后，非于高辈所能蹶其后尘者。

誉岂无因毁有辞，输他桃杏斗芳姿。先生好致平章语，风味哀梨尽可思。

丰神洒洒二刘间，翠扫峨眉语带蛮。那似吴姬娇蹑酒，拨弦低唱念家山。

黑髻红髯粉面妆，踰垣巧护锁云囊。绿林侠骨真堪羨，谁识人间窈窕娘。演《锁云

囊》女贼甚佳。

琴声落落指生寒，不似箏琶错杂弹。曾说梨园有三妙，银儿幻术桂儿兰。银官戏法、桂官画兰、万官弹琴，时称三妙。

张莲官太和部，山西太原人。年逾弱冠，秀雅出羣，莲脸柳腰，柔情逸态，宛如吴下女郎，絕不意其为西人之子也。不趋时好作妖媚之状，故豪客未之齿及。余闻诸韵湖居士，往观其剧，果属不凡。因叹如斯丽质，埋没于蟠腹睥目之俦。遗珠之憾宁有极耶！

鬓影脂光照眼新，轻盈态度半横陈。吴儿莫漫夸歌舞，自是西方有美人。

蜀伶浓艳楚伶娇，杨柳章台斗细腰。何似红莲低映水，香风微度酒痕销。

戈蕙官余庆部，字晚翠，直隶景州人。姿态明艷，鲜有韵致，盖不从梨园法曲中来，徒事妖冶以趋时好。余甚惜之。歌楼称『赛银儿』，未免唐突西施矣。友人韵湖居士大为契赏，字曰『心香』，仅以诗扇相赠，恐悬马首于门而往市牛肉也。

灼灼争夸时世妆，竞将艷冶媚钱郎。可怜壮悔堂中客，镇日空烧心字香。

桃花不语下成溪，无限春风送鸟啼。堪叹一枝红踯躅，漫夸烟雨欲凄迷。上二句谓陈银儿

陈金官余庆部，字丽仙，四川重庆府人。貌似银儿，绰有憨趣，丰致可人。虽曲艺未能精熟，而声容真切，罕肯依样葫芦，不患其不日进也。惜哑钟不响，若按律而使之能鸣则善矣。与蕙官同部，静躁迥别。余谓犹红踯躅之于贴梗海棠，友人为之称快。

娇小婀娜逸兴赊，夜行秉烛步欹斜。真王佳气从儿现，赢得风开荳蔻花。是日演《龙蛇镇》

一样娇红滟滟流，个中鲜翠有沈浮。饶伊欲赛银儿好，貌似先输第一筹。蕙官称『赛银儿』，金官貌似银儿，人往往误认。

高明官萃庆部，字素亭，直隶沧州人。小身弱骨，丰致娉婷，絕无浮艳之态，惜艺未娴熟，真趣不能流露。近有于三元颇带村气，不似明官媚秀。友人韵湖易蕙官之爱以爱明官，极誉其美，欲位置银官之后。余曰：此固蚌胎，非同鱼目，然继照乘之珍，请俟他日。或讥明官为小家女子，三元是乡里姑娘，亦切喻也。呵呵！

玉韞山辉媚有余，连城声价尚徐徐。心香本是无明火，莫向明儿赋子虚。韵湖以『心香』字蕙官，今易爱明儿，诗以嘲之。

翩跹小足踢球门，笑语咿哑尚带村。那似明儿娇欲滴，梨花春雨黯消魂。明官演《小寡妇上坟》，甚是娇媚。若三元之《浪子踢球》，村不可耐。

于三元宜庆部，字湘竹，四川绵州人。巧笑蛮声，工于妩媚。友人韵湖契焉。余叙高明官言三元颇带村气。韵湖与语，三元不解所谓，乃曰：『言汝《背娃子》一出，状乡里妇人，神情逼肖，故尔赞汝。』三元大喜，嗣后娇痴谑浪，无不与『村』字暗合，盖神似而非故为摹拟也。然声技颇工，故美璧以下部中推一作者。近闻有豪客往还，门前颇不冷落，可谓『野花偏艳目，村酒醉人多。』诗以表之。

旧雨微歌喜共谈，阿依娇艳阿谁憨。绝怜野草关春意，荠菜花开三月三。谚云：『三月三，荠菜花儿上灶山。』言亦有得时之日。

传神一剧《背娃娃》，村妇痴顽笑语哗。薄酒中人粗布暖，锦帏春色属谁家？

王五儿萃庆部，名联官，顺天涿州人。年未弱冠，细肩瘦靥，秀色可餐。友人招与同饮，举止落落，无浮浪恶习。视之更觉妩媚，询其技，昆曲、京腔俱善，压于名辈，不能一展所长。五儿欲有所诉。余曰：『姑饮酒，无作怪哉虫！』尝演《三荆记》《打灶王》，活泼可喜。因未为众赏，诗以张之。其师弟六儿萃庆，部，姓张氏，名全官，涿州人。视下而癯，面如削瓜，脂粉登场，有『似生色骷髅』之诮，方之五儿，未可云酥酪弟兄也！

歌坛声誉重王、刘，媚眼横飞好语稠。爱尔柔情似通德，无言拥髻最风流。

试将脂粉斗红妆，恰称王家十八娘。五儿今年十八生色骷髅甘退步，盈盈骨细与肌香。

《慢亭集》载：明万历间女子王十八娘，自云天宝宫人，与东海生冥会，歌〔菩萨蛮〕词云：『倾国斗红妆，人称十八娘』。考东坡《荔枝词》『骨细肌香，恰是当年十八娘。』盖十八娘，即荔枝也。《慢亭集》乃寓言耳。

苏喜儿宜庆部大兴人。年甫弱冠，面白而妍，两辅微尖，双观略起，身材五尺以长。阎福儿宜庆部，顺天良乡人，本姓李，为阎九分子。年未冠，目秀多姿，较喜儿带媚，身材亦与雁行。二人妆束宛如姊妹，作姑嫂嫡庶更为神似也。其声技未见专长。福儿颇有活泼机趣，歌喉圆溜，皆后进中之出色者。

移兹燕姬色更娇，舞衫歌扇足魂消。盈盈二妙相依倚，宛似江东大小乔。

春愁无奈影双双，蹙损蛾眉意未降。聊与为谋惟我尔，芭蕉夜雨滴幽窗。是日双演《别妻》《思春》

王升官宜庆部，四川绵州人。妙齿小身，容仪修洁，憨非似庆

王庆官，媚不如联

王联官，落落丰标，自足怡人，情志固不在涂脂抹粉时矣。然声技之佳，颇为观者所赏。部中后起，于斯屈指一筹也。韵湖屡称其美，余亦乐道其良，诗以识之。

一曲清歌欲绕梁，纤腰宛转映霞裳。乌衣巷里春灯晚，解佩谁沾意可香。

任他浓艳舞春风，脉脉柔情静女同。郤笑司空曾见惯，又添公案在墙东。谓韵湖

蒋四儿，永庆部直隶宣化府人，魏长生之徒。秀眉方面，颇有微麻，而柔媚嫣然，望之如瞻卜兜罗，别饶丰韵。所演皆梆子、秦腔，于羞涩中见蛾媚之态，回视魂挑目招者，真桃李舆台矣。部中自长生外，观者咸为瞩目，洵堪迹芳尘也。

蛙声阁阁柳依依，谑语相调笑辅微。欲识娇颜谁得似？春风吹放野蔷薇。

每于淡雅见新腔，瘦骨珊珊素影凉。无限含羞偏妩媚，烂桃繁李任披猖。烂桃繁李谓三元、蕙官二人，最为妖冶。

贾四儿，集庆部大兴人。年未弱冠，秀目妍姿，身材绰约，其娇艳彷彿湘云，而歌韵则桐花伯仲也。近见其演《狐狸思春》，润斋谓如花解语，似柳传情。余曰：『若以花喻是儿，当如萼李，竟赏其浓郁鲜媚，而于淡宕闲神，差逊海棠、芍药。然千红万绿中亦堪睥睨羣芳矣』。润斋为之击节称快。

一朵娇红压众芳，东风袅袅试新妆。欣看北地胭脂艳，漫向西州问海棠。

愁春未醒奈情痴，谁破春愁慰所思。恍似夕阳花影飏，消魂倩女欲离时。

得气桃花分外娇，靡芜诗句最魂消。品题藉有张公子，谁遣幽斋慰寂寥。『桃花得气美人中』，柳如是句也。

谢女腰肢尹女歌，嫣然笑靥溜横波。堪嗟后进纷纷者，半是行尸奈若何。

《燕兰小谱》卷之二终

●燕兰小谱卷之三

西湖安乐山樵吟

○花部共二十六人，计诗四十八首

白二永庆部，大兴人，原系旗籍，旦中之天然秀也。昔在王府大部，与八达子、天保儿擅一时盛誉。余乙未入都，渠春光烂熳，已开到茶□矣，然兴未阑珊，声名不减。庚辛间，魏、陈叠兴，门前始为冷落。今又数年，风致犹然，而景况萧闲，自觉不堪为使君新妇，不胜感慨系之。至其歌喉清亮，音节圆美，有绕梁遏尘之韵，非时辈所能企及。

察罕家风涅不侵，素娥小队是知音。梨花雪后茶□雪，撩得春愁几许深。元察罕，西域人，生时月白如昼。国语以白为察罕，因以名之。仁宗赐姓白氏。

未睹妖妍二月时，品题何处写芳姿。永新歌韵依然在，玉树临风祇一枝。

宜笑宜嗔百媚含，昵人娇语自喃喃。风流占断葡萄架，可奈楼头有魏三。常演《潘金莲葡萄架》，甚是娇媚，自魏三《滚楼》一出，此剧不演。

扇底相逢已十年，徐娘风致尚翩翩。先生惯作周郎顾，鬓点吴霜也自怜。

于永亨，萃庆部俗号『耗子』，山东即墨人。弱龄娇好，豪客争趋。今虽过夭灼之年，而丰肌露靥，犹然一朵玉楼春色也。声技工稳，娴雅多姿，无折腰龋齿之态，视名下诸郎可称曹大家矣。诗以张之。

丰姿缛质映春衣，暖玉年来识者稀。小有芳名同鼠子，固应糠粃笑君肥。

闹扫妆成插鼠姑，是日所演蛮声脆语似莺雏。宝儿憨态真殊绝，应把轻盈诮玉奴。

平泰儿，余庆部姓刘氏，宛平人，五年前之风流旦也。小身白皙，面有微麻，目冉冉如欲语，撩人正在阿堵中。今顾而长兮，妍媚之态，视昔顿减，而齿牙松脆，风致洒落，如燕赵佳人，不乏俊爽。友人以余为相赏于风尘外者。

盈盈脉脉眼波融，转瞬能教密意通。昔日风流难忘郤，桃花色借美人红。

莺歌呖呖圆而滑，燕语喃喃脆欲流。风度祇今饶俊爽，白荷花好颭新秋。

杨四儿宜成部，名芝桂，四川成都人。过季隗请待之年，而脸际生春，眉间带媚。

致綏綏有狐意。尝着一羊裘，贴翠围金，炫耀夺目，于彼辈中亦云服妖人，多以『四苗子』称之。其技亦未见所长，尝演《吉星台》，作□髻妆，吸淡巴菰，颇饶姿趣，可以觐其大概矣！

一从伪伎出歌台，府乐开元按部排。何事儿家妖且艳，想因拜月幻形来。叔孙通定郊祀，制伪女伎，此旦色滥觞之始。唐开元中，以伶工之佳者为立部伎，次为坐部伎，又次为雅乐部。元院本色目云：『旦之命名，义取于「狽」。盖狐之淫者。』狐狸顶髑髅向月而拜，则变为人形。

翠钿金缕压襟裾，风致綏綏媚有余。自是苗人好妆束，红绫贴鬓笑轩渠。鬓边贴红绫膏，如棋子大，其徒永春亦然，盖取媚也。

杨五儿，双庆部四川达州人。姿态村朴，有婢学夫人之状。弱冠时固名动歌楼也。魏三初演《滚楼》，五儿为之副色，一时魏、杨并称，犹金菊之借光芙蓉然。其它杂剧，风致亦楚楚可爱，知非默处囊中者。

莺声呖呖燕喃喃，龋齿迎人媚态函。自是野花偏艳目，称他窄袖与青衫。尝扮卖婆，村伎甚是称峭。

偶摹闺阁礼雍容，浪有双名比姮娥。红蓼凌波秋欲晚，霜华那得似芙蓉。

孟九儿，大春部山东历城人。颀长白皙，风韵老成，盖其年已数到星张翼轸矣。妙龄修饰，韶美可人。尝演百花公主，戎衣结束，秀媚中颇饶英气，想见秦良玉勤王召见时。其它杂剧，则梆子腔俱多，为京班别派。

一声檀板出倾城，扇底相看别有情。箏阮调高蛙漏促，踏摇娘苦月三更。

绣旗锦伞列前幢，剑气龙文鼎可扛。漫说将军无敌手，古来巾帼最难降。

薛四儿，太和部名良官，山西蒲州人。西旦中之秀颖者，丰姿婉娈，面似芙蕖，于儿女传情之处，颇事酝酿，而台下「好」声寂然。吁！可怪哉。余谓好花看开在半开时，闺情之动人，在意不在象，若观『大体双』南汉刘鋹，令宫女与人裸合，自拥波斯女观之，号『大体双』。味如嚼蜡矣。

无限风怀旖旎情，春光微逗可怜生。红楼佳处多含蓄，羞向唐宫镜里行。

嘹呖京腔响遏空，勾音异曲不同工。雁门山上初飞雁，忆煞当歌盛小丛。山西勾腔似昆曲，而音宏亮，介乎京腔之间。

黑儿，王府大部姓刘氏，大兴人。年仅弱冠，紫棠色目，闪闪动人，常与白二演《葡萄架》，作春梅旖旎之态，犹是可儿，惜非雪点寒枝也。为一外吏所契，岂卯金之波斯女乎？

黑短无嫌媚自工，郗教人忆贾南风。辛夷开烛霞光好，满院桃花枉烂红。韩昌黎《辛夷花诗》：『清最辉辉烛霞日』。

未称池边瘦影寒，空怜旖旎半春残。风流太守曾相赏，一朵娇痴墨牡丹。

三寿官，双庆部姓张氏，字南如，陕西长安人。奇葩逸丽，娟娟如十七、八女郎，令人心艳。惜无歌喉，只演《樊梨花送枕》，摹写情态而已，余戏以『哑旦』目之。

复陶翠被出军门，街鼓春寒夜帐温。捧枕无言情脉脉，一枝红艳美人魂。

息国风流只自伤，桃花人面媚君王。几家会得无声乐，哑趣传神许擅长。

张兰官，余庆部四川叙州人。妖娆旦也，柔情绰态如弱柳当春，临风自赏，在后进中不可多得。史章官，余庆部陕西西安人。貌仅中平，而弱骨多娇，似柳态三眠，低扬莫定，于彼中气习，可谓化百炼钢为绕指柔矣。其声技俱有可观，非碌碌无奇子也。

摇曳多姿态度妍，风流一曲霸王鞭。灵和殿角依依柳，说着张星倍可怜。

柔媚迎人无限娇，吴侬谁与斗纤腰。剧怜杨柳苏台种，一例销魂到灞桥。

张荣官，萃庆部大兴人。腻质柔姿，面如鹅卵，惟嫌目分大小，不工妩媚。陈美官，宜庆部银儿之族弟，白面俏麻，风致楚楚。二人夙有名誉，今半学易之年，不为时赏，然声容态度尚有典型，视新进浮梁子弟，宋时谚语：『借浮梁为无长』藉涂饰以为娇、滥淫以为媚者，其丰范翛翛乎远矣。

赢得风姿半面妆，嫣然一笑强登场。双眸莫讶同梅婢，恰称新歌骂玉郎。《艳史》：西门式婢春梅，左眼大，右眼小。

一笑相逢媚欲生，桃花细雨脸波横。到门未必能惊座，空使元方有令名。

永福儿，萃庆部姓彭氏，直隶沧州人。眉宇爽朗，清雅不凡。本习小生，后改旦色，故举止落落，乏妖冶之态。今虽举步邯郸，而忸怩不宁观者，转增其媚。惜颧高口阔，非女儿家窈窕形容也。近见其演《佳期》，颇饶韵致，诗以酬之。

衫裙窄窄指纤纤，小步轻盈绕画帘。一点灵犀通内里，密云含雨锁眉尖。

半夜恩情慰积思，人间天上此佳期。如何钟动催归去，惹得王生惆怅词。唐王涣《惆怅词》，用崔徽佳期事。

满囤儿萃庆部，姓王氏，名中官，陕西蓝田人。刘芸阁之徒。面目颇有回派，精悍可喜。其技长于跌扑，尝演《如意钩》《擂台订婚》，如芍药翻阶，令人目眩，至末后一跌，似怜似怯，传情在无意间。为之击节欣赏，即剧酬之。

好姻缘共恶姻缘，契结三生岂偶然。入手漫拈新妇臂，翻身先饱女儿拳。擂台先打退二人

乍睹金钩意已亲，略于偏反逗丰神。倾心一跌娇无力，儿女英雄两可人。

常永春，宜庆部字煦载，一字妙莲，顺天涿州人。丰神秀雅，无媚容，无俗态，有翩翩佳公子之风。屈于旦色，恐未能学步邯郸也。闻曾习举业，应童子试。今夏见其书扇，摘《归去来词》云，『悟已往之不谏，知来者之可追；实迷途其未远，觉今是而昨非。』心甚惻然。张君润斋赠妙莲印章字之，冀其出泥不污也。近为琅玕君所契，安之若素，乃如之人一至斯乎。昔尤西堂作西子文，有怜、爱、奇三义，余于永春，不觉兴感于斯焉。

清神皎皎映琼姿，几度相逢几费思。忆取西堂西子艺，我怜我爱我奇之。怜其美少年，爱其文字工，奇其变为无良子也。

好从谢客分清艳，莫向张郎斗丽华。出自污泥原不染，称名不媿妙莲花。

罗荣官，宜庆部顺天良乡人，旦中之夭桃女也。年未弱冠，何粉潘姿，不假修饰，令人目注。施兴儿，宜庆部直隶天津府人，当总角之年，明艳妖娆，颇饶风趣。二人于曲艺未娴，梨园中只堪作坐部伎耳，然豪客征歌，屡为契赏。『如意馆中春万树，一时齐让郑樱桃』，何必藉歌舞以乐少年耶？狡童之诗，吾为若咏，于戏二字读本音风斯下矣。

初日芙蓉写艳姿，张郎玉貌动情思。男儿已掷盈车果，何用乔妆假女为。荣儿不宜作女妆

腰鼓声圆若播鼗，临风低唱月轮高。玉容无限婆婆影，不是狂奴兴亦豪。是日演《花鼓》，甚佳。

张喜儿，永庆部河南祥符人。玉质翩翩，目如秋水。杨宝儿，太和部贵州贵阳人。

素靥娇憨，有柔媚昵人之态。二儿年俱十五，其技似莺雏学语，尚未成声。而『荳蔻梢头二月初』，豪客于焉瞩目。『婉兮变兮，总角卅兮』。吾为二儿慨然也。嗟乎！两省伶工都下素无闻者，今惟二童子争妍竞媚，谁欤为雉媒者耶？习俗之染人一致斯欤！

歌楼弦管听应稀，豪客争邀伴醉归。已爱羞容桃灼灼，更怜柔绪柳依依。

抛离乡国上京华，十五盈盈正可夸。堪叹无瑕双白璧《候人歌》韵属儿家。《吕氏春秋》：『涂山氏女命侍妾待禹于涂山之阳。女作歌曰：「候人兮猗。」实始为南音。』二儿自立门户以待豪客，故云。

王庆官，集庆部字荐庭，直隶天津人，杨四苗之徒也。年始成童，眉目轩爽，尝使陪饮，拇战豪呼，风生四座。似憨而黠，含媚于标，宜乎抹粉登场，浪荡妖淫，有不待揣摩而合拍者。嗟乎！童子何知，世风不古，若王联官之忸怩腼腆，我见生怜，不可同日语矣。悲夫！

娇憨无藉转星眸，正是瓜时始上头。为语联郎多妩媚，可人情处半含羞。

粉儿风致欠温馨，谑浪情怀笑语村。一片好声频送处，阿谁真个欲消魂。

谢玉林，萃庆部江西新建人，为于永亭之徒，姿首清妍，身材纤小。昔人称李香为『香扇坠』，若玉林真可『怀中婀娜袖中藏』矣！其技不甚多见，而花枝摇扬，莺语惺忪，不减南国佳人风致。友人许君大加赏识，洵非爱者之虚言也。

人比黄花瘦影同，翩跹舞袖怯西风。当筵莺语调笙韵，环佩多应在楚宫。

雨态云情似漆胶，于飞无计效鸾交。阿师对此增羞涩，鸬鹚相喧孰解嘲。是日演《倒听》，永亭作女状元，玉林为新妇，羞态愈觉可人。

曹珪官，集庆部字文达，四川筲州人。清姿而质，瘦颊隆颧。其技未见所长，而机趣活泼，有媚态而无冶容，在部中可云闺闱之秀矣。闻其昔为小史，今入梨园，想习染未深，故多羞涩。相赏者当于时调外求之，或有契焉，

逸韵翩翩意态浓，清姿依约似芙蓉。羊欣惯仿夫人格，虽尔欹斜亦正锋。

曾侍兰台燕寝香，顿施朱粉入歌场。梨园弟子多卿辈，谁是新声田顺郎。

姚六儿，萃庆部大兴人。姿仅中平，齿已加长，善于妩媚，丰度犹堪。昔在集成，夙有名誉。今入萃庆，友人谓其佳处祇在飞眼撩人一笑间，至于弹琵琶、唱小曲，

齿牙松脆，令人如睹燕赵佳人，粉白黛黑，固非后进之可企及也。

塞上春风猎地回，草青毡帐喜衔杯。琵琶不诉《昭君怨》，听唱新声《阿滥堆》。
是日所演

丰姿詭胜小妖娆，孙寿妆成百媚娇。最是眼波斜溜处，天游相见欲魂消。

马九儿，集庆部四川重庆府人。丰姿秀媚，态度停匀，望之如妙齿女郎，问年已逾房老。昔马湘兰当半百之期，犹有少年欲娶为妇。盛颜久驻，天岂独鍾于此辈耶？抑彼人自有术耶？向在大春部，藉藉有名，惜未留意。今相赏虽迟，而柳重桃酣，尚是春风得意时也。

凤粉琼妆宛转歌，恍逢天女散陀罗。十年丰韵浑如昨，何必樽前感逝波。

重来歌馆一番新，柳重桃酣占好春。自是家风能驻色，儿曹休莫笑陈人。

魏三，永庆部名长生，字婉卿，四川金堂人。伶中子都也。昔在双庆部，以《滚楼》一出奔走，豪儿士大夫亦为心醉。其它杂剧子胥无非科诨、诲淫之状，使京腔旧本置之高阁。一时歌楼，观者如堵。而六大班几无人过问，或至散去。白香山云：『三千宠爱在一身，六宫粉黛无颜色』，真可为长叹息者。壬寅秋，奉禁入班，其风始息。今虽复演，与银官分部，改名永庆，然较前则杀去声矣。而王、刘诸人，承风继起，亦沿习丑状，以超时好。余谓魏三作俑，可称野狐教主。伤哉！幸年届房老，近见其演贞烈之剧，声容真切，令人欲泪，则扫除脂粉，固犹是梨园佳子弟也。效颦者，当先有其真色，而后可免东家之诮耳。

媚态绥绥别有姿，何郎朱粉总宜施。自来海上人争逐，笑尔翻成一世雌。王百谷《吊马湘兰文》云：『固一世之雌也，而今安在哉？』

镜殿春风作去声意描，阿翁瞥见也魂消。十香词好从儿唱，赢得罗裙几度娇。

『那识罗格内，消魂别有香』，辽乙辛十香词句也，见《焚椒录》。

触处相关儿女情，欢场喜见一番更。梨园旧曲无人顾，尽日闲愁白发生。

黯黯春云暖欲低，桃花红蕊乱莺啼。效颦邻女空娇小，未许依家旧姓西。

《燕兰小谱》卷之三终

●燕兰小谱卷之四

西湖安乐山樵吟

○雅部共二十人，计诗四十四首

吴大保，宜庆部字秀卿，江苏元和人，旦中之两头蛮也。姿容明秀，静中带媚，本习昆

曲，与蜀伶彭万官同寓，因兼学乱弹，然非所专长。昔为河南公所契，今作出墙红杏。方驾王刘。友人昌黎生，见谱中未有题赠，大加骇异，谓迟咏一日则增一日罪过，乃赋四诗，以赎前愆，今而后可以消灾延寿矣。

秀质妍姿迥不凡，应趋柔殿衣黄衫。如何点缀闲脂粉，惹得登徒两眼馋。唐《礼乐志》：『选乐工姿秀者十余人，衣黄衫，文玉带，侍左右。』

嫩白纤柔晃似冰，蜃中有女势凌兢。怜伊幻出如花貌，恰笑珠胎结未能。尝演蚌精，甚是娇媚。

知交投分有莲卿，并处蛾眉妬不生。一自楚云萦远梦，陈相学许独铮铮。万官，字庆莲。

名誉王刘竞一时，为怜罕见未摛词。忤除绮业惟风雅，从此消灾仗药师。释曰：『消灾延寿药师佛。』韩君知医，故戏之。

四喜官，保和部姓时氏，字瑶卿，江苏无锡人。本贵邸小竖，幼习梨园。雪肤兰质，韵致幽闲，有玉峯、梁溪丰度。虽兼唱乱弹，涉妖妍而无恶习，与陈、王、刘、吴并邀时誉，而梔子含香，非秣李夭桃闲撩蜂蝶也。今齿长色衰，阑入集庆部内。歌楼谈之者，犹望彩云焉。

云阶月地见神仙，浓口应夸供奉篇。每向歌楼欣一覩，杜兰香又下瑶天。

素质娉婷耐久看，天生粉面没包弹。樱桃树下多娇媚，颗颗珊瑚赛木难。尝演《打樱桃》，口吐胭脂颗颗，愈增其媚。

灯影摇红月影流，新妆窈窕胜王、刘。徐翁不解探花趣，醉里俄惊花见羞。马观察家演萃庆部，四喜暮至，命专演一剧。徐水部太翁于灯下见之，大为称赏。『花见羞』，五代刘鄩妾名。

本是梁溪队里人，爱歌楚调一番新。蛙声阁阁三弦急，流水桃花别有春。

张柯亭，保和部名鸣玉，初字珂亭，江苏长州人。神清骨秀，望之如带雨梨花。尝演《小青题曲》一出，人与景会，见者魂消。某巨公大加契赏，易其字曰『柯亭』。昔柯亭在南，为一墨吏所爱。辛丑，墨吏被逮入都，挈家北上，寄迹京班，常往探圉圉以慰岑寂。今春墨吏典刑，柯亭在戏场闻之，更衣奔赴，一恸几绝。虽所事非人，而感恩知己，不以衰荣易念，视见金夫不有躬者，相去何如耶？继而落落不偶，仍挈家南返。鸡鹜羣中，忽睹寥天一鹤，为之三叹。

珊珊瘦骨出娉婷，几见幽窗泣小青。千古情根消不得，梦魂应傍牡丹亭。

不受风尘涅与磨，翩翩花下度清歌。金闺名彦多情甚，之子相逢咏伐柯。

树覆巢倾事可哀，感恩相伴逐舆台。未知金凤分飞后，曾为东楼一恸来。优童金凤，为严世蕃所爱。

振翩高飞迥不羣，熏莸原是不同的芬。从兹歌舞江南好，无限青峯散彩云。

周四官，保和武部字玉奇，浙江仁和人。年始弱冠，素质艳光，略无妖冶。古愚居士品其色技，兼有时瑶、卿郑兰生之长。有美一人，清扬婉兮，如遇于西陵松柏下也。三弦弹词，娓娓动人，良月风清，足怡情志。向因吾杭无人，谱中未免寂寞，今得玉奇，不全为他人作嫁衣矣！

淡妆浓抹忆西湖，婣约欣看美且都。陌上花开歌缓缓，吴侬犹记此音无。《陌上花》，吴越吴肃王时歌也。

三弦清切语呢呢，灯火微明夜漏迟。无限风怀忘不得，何如听唱鼓儿词。

姚兰官，太和部江苏扬州人。纤腰仄步，细颈寒肩，望之绝似柔媚女郎，不辨其为伪伎也。在西部中无有赏者，姻娅赵君，称其闲远有闺阁风。余曰：『此如日览名园，忽于村舍疏篱得小红数朵，迎风潇洒，不禁为之翛然神远。然兰官之风韵，亦于斯窥一斑矣。』

雄雌不辨态纤纤，歌绕梁尘韵自恬。但有谢家风致远，任他秀色灿珠帘。珠帘秀，元歌伎名。

落拓京华十载过，尚余逸兴爱征歌。饶他三庆多娇口，雅韵宜人有太和。谓萃庆、宜庆、永庆。

锡龄官，永庆部姓张氏，江苏长州人，景山梨园子也。雅□不浮，小身玉质，其技宜于苦戏。余谓长生昔事妖冶，衬以银儿；今事真切，辅以锡龄。银儿似春深芍药，锡龄如秋晚芙蓉，可称二美。然豪客喜春华而不喜秋实，故锡龄声誉无闻焉，为之兴叹！

漫说妖妍带露姿，殷红独占晚霜时。秋江冷□无人赏，惟有闲沔仔细知。

梁溪乐谱奉君王，歌韵争夸御史娘。不是九重远声色，人间那得有田郎。御史娘子、田顺郎。皆唐贞元宫中乐人。

双喜官，保和部姓徐氏，江苏长洲人，亦隶贵邸，与四喜并宠，歌音清美，姿首娇妍。弱冠后，顾长堪憎，顾景自伤。尝演《玉环醉酒》，多作折腰步，非以取媚，实为藏拙。其心良苦矣。歌楼评四喜曰『妖』，双喜曰『高』即长也，可以窥其优劣也。而声技之佳，征歌舞者犹流连于齿颊云。

芙蓉滟滟泛秋江，赢得佳名并蒂双。一朵彩云欣出岫，美人声价重南邦。

婀娜多姿柳带牵，临风摇扬玉楼前。几家若作曹交妇，纵不齐眉也及肩。

严秀林，保和武部字芝田，江苏无锡人。妙龄娟秀，白皙娇妍。昔人以江瑶胜驼峯、熊掌，非虚语也。友人张君大加契赏，邀余观剧，以征所鉴之非谬然。修容似玉，压臂无金。吾为秀林怜，为张君愧矣。聊以情语解嘲，作如兰之雅券云。

玉素亭亭不自持，风前绰约好腰支。二分明月三分柳，个是芝郎写照时。二分明月，觐光几许；柳色三分，未成恨也。感秀林之未遇。

倜傥张公为赏音，恨山奚止一钩金。从来豪客多轻薄，谁解如兰臭味深。

得发儿，保和部姓周氏，字定珠，江苏武进人。靡容腻理，雅态柔情，擅名十余年，为昆旦中秀相者。幼曾为小史，后随主人出莅山右。顾俊德，吉祥部亦无锡人，靓妆秀质，美擅歌楼，昆旦中之翹楚。旋以他事回南，今来京遂弃所业。而故交冷落，时有弃旧之感。尝与俞翁同饮，聆其语，已如商妇琵琶矣！为之□然。

舞衫歌扇昉轻盈，十载京华早擅名。不忘深恩依旧主，樽前时度啖春莺。

黛痕零落鬓丝髟，冷语凄凉诮老馋。未覩梨园生白发，已教司马湿青衫。

桂林官，端瑞部姓刘氏，江苏元和人，昆旦中之韵胜者。玉貌翩跹，温文闲雅，绝不似乐部中人。喜书史，能举业，亦善画兰，骀骀乎有文士之风。戊戌春，予过友

人寓，与之同饮，不知其为伶也。友人言及，颇以文士待之。继闻浙东某县佐延入幕中书启。后回苏，不数年而殒。

秀骨棱棱孰与偕，相逢不是弁而钗。芳心一缕书千古，肯向泥涂抵死埋。

上苑巍科王右丞，琵琶一曲快先登。天梯若许侯门借，技发屠龙叱亦能。桂林曾冒北籍考试。

周二官，保和武部江苏长洲人，旦中之房老也。其《卖鱼》一出，摹写网船嫩妇，形容曲肖，音调谑如在金阊牙市中，令人叫绝。小周四官，同部元和人，年仅成童，伶俐活泼，无非天趣，惜面方不媚，豪客未之赏焉。是日演《拷红》，眼色传神，跃跃欲语，不独齿牙吐慧，称可意侍儿。友人张君契赏已非一日，诗以识之。

蛤蚌团鱼满担沽，偶逢相谑巧支吾。南濠多少秧歌脚，风味萧骚似尔无。南濠有少妇缝穷送暖者，多不缠足。人呼为『秧歌脚。』

啼笑如真无限娇，担当风月小妖娆。可怜窗外窥情女，祇是胡卢依样描。是日有某官演《佳期》，兴致索然。

李琴官，文保和部江苏元和人。年仅弱冠，目妍而瞬，面瘦而腴，虽非谢氏闺英，亦属郑家文婢。尝演《裁衣》，风流酝藉，有企爱之神，无乜斜之态。诗云：『既见君子，我心则降。』吾于斯剧恍然也。若他人之始庄而终浪者，徒见其丑秽耳。

娇态临风弱不支，却于酝藉动情思。目光冉冉浑如语，想见寒花未嫁时，寒花，归熙甫婢。

狼藉瑶卿与秀卿，两头蛮触损清名。梁溪丰范从谁说，酥酪而今有弟兄。其弟秀官，在永庆部。

孙秀林，吉祥部浙江德清人。丰神俊朗，眉宇轩豁，无柔媚可怜之色，昆旦中之矫矫者。在京班一二年，即弃所业。余去冬相见，翩翩不羣。闻今春南返，在张湾舟中已作泉下少年郎矣。『可怜无定河边骨，犹是深闺梦里人』。诗以伤之。

出墙红杏倍生妍，洒落春光媚远天。见说园中花事好，供谁攀折倩谁怜？

归帆稳称入东吴，啼遍春山旧鹧鸪。一夜凄风兼苦雨，可怜红蕊没青芜。

王翠官，庆春部浑号『水蜜桃』，江苏元和人，昆旦中欢喜缘也。恬雅妍媚，水团面笑容可掬，人见之未有不欢悦者，雅号于以称焉。尝演《絮阁搜妆》，恰称玉环

娇态。今回苏，而是班之彩云零落矣！

侵晓冲寒叩紫宸，妬情娇语可怜春。饶他四面观音好，未底王昌态度匀。苏旦有号『四面观音者』，以《长生殿》得名。

玉容春盎润如膏，赢得人呼『水蜜桃』。却笑吴姬名亦尔，两般滋味尽酖醺。友人云：金阊有伎，亦名『水蜜桃』。

韩学礼，保和武部浙江钱唐人。朴质无姿，齿已加长，宜于苦戏。盖南中梨园不事冶，惟取曲肖形容，令人怡情而已。新自苏来京，友人张君见其《送米》《哭灵》，为之感痛，因以梓里，属余品题。余曰：『昔陈老莲之画美女，多鸬鹚形，以『万壑千岩，其秀在骨』，非吴下水乡徒滋柔媚。吾杭越地也，爱学礼者，作老莲之美女观可乎？』

洗涤铅华静不浮，哀弦苦调见风流。梨园尽是他乡侣，谁把杭州曲子讴，白香山句

白傅深情祇自伤，潇潇暮雨忆吴娘。十年抛却西湖好，怕听相思引恨长。杨升庵云：『吴二娘，杭州名妓，有《长相思》一词。』白香山诗：『吴娘暮雨潇潇曲，自别江南久不闻』，盖子美之黄四娘也。

李秀官，永庆部江苏元和人。鲜肤秀色，文弱堪怜，腰未褭而多姿，眼不波而自媚，令

人有宋玉墙东之感。向在永祥部，如玉韞椟中，歌楼罕觐，今则入五都之市，为有目者之所共赏矣。

纤柔定似柳丝丝，谁赠春风袅娜词。移向苏台鬬歌舞，起眠情绪耐人思。

卸却新妆懒自拈，无因重见态纤纤。爱他帘隙窥人处，约腕金黄指玉尖。卸妆后，揭帘偷视，腕指如玉，为彼中之难得者。

金桂官，萃庆部字缦亭，江苏常熟人。清姿瘦骨，膩理柔容，如俟城隅之静女，无桑间

态，亦乏林下风。素习昆曲，曾为外吏衙前，今春阑入部内，匝月之间，泽车华服，气象改观。噫！为之执鞭亦所欣慕焉矣！

薄施脂粉已嫣然，歌韵曾夸相府莲。为爱娇多身转怯，几形皃脰与鸯肩。幼为南沙蒋氏小史。

燕寝趋承宠爱浓，翩翩花影度春风。卯儿幻入霓裳队，漫把铜山笑邓通。

张发官，保和文部江苏元和人。面如瓜瓠，弱不胜娇，雅韵闲情，有谢夫人林下风致，耽清静，解文墨，尝见余《燕兰谱》，略识此中款要，知非庸俗伶工矣。昔保和部，本昆曲，去年杂演乱弹、跌扑等剧，因购苏伶之佳者，分文、武二部。于是梁溪音节，得聆于呕哑谿浪之间，令人有正始复闻之叹。嗟乎！梨园虽小道，而状古来之忠孝奸顽，使之感发惩创，亦诗教也。诗人之感，在士大夫；梨园之感，及乎乡童村女，岂曰小补之哉？部中皆梨园父老，惟发官年二十四，为最少，回视陈、王、二刘，不必出门合辙也。以之作殿，殆曲终奏雅欤？

弱质娉婷爱羽毛，琵琶羞唱郁轮袍。唐昌玉蕊真仙种，莫认元都观里桃。

淡妆雅服出轻盈，意态丰姿宛转生。几度悠扬闻玉笛，江南风月最关情。

艳冶浮靡诂苟同，耽闲绰有士人风。燕兰妙谛渠能识，不羨家明韵语工。南唐优李家明，能诗。

太平无象尽消摇，妙舞清歌乐圣朝。会得诗人风化远，郑声屏去奏虞韶。

《燕兰小谱》卷之四终

●燕兰小谱卷之五

西湖安乐山樵吟

余叙列诸伶，以甲午为限。而前此名优之可采者，于斯附见焉。至于佚事、新闻可征者，述其颠末咏之；传闻者第寄一时兴感，其事则隐而不录，恐人言未的，不敢以之速咎。因分杂咏、杂感，聊寓讽诫，犹赋之有乱辞云。

杂咏共一十八则，计诗二十八首

友人言：苏伶有号『碧成夫人』者，姓李名桂官，字秀章，吴县人。昔在庆成部，名重一时，尝与某巨公乡谊，时佐其困乏，情好无间。后巨公莅外省，桂官亦脱身同往，于今十数年矣。闻其慷慨好施，颇无资蓄，是优伶中之勇于为义者，是可识也。

漫将巾幗事倾城，雅意伶才别有情。赚得豪儿金似土，夜来闻唤状头声。

友人言：昔苏伶唐玉林、方兰如，长洲人，在庆成部一时之彼美也。秀州某贾与之契好。所有贸易之资，尽耗于浅斟低唱中。既而贾以逋负被繫，二人告其友曰：『贾之事，公所知也。倘藉公之力，为渠解纷，则二千金之助。吾两人在，何至废业失所？』友感其言，为之平章息讼。未几，贾复与他伶狎。二人怆然曰：『溺不可拯也，我不负贾而贾实负我矣！』其金遂绝。噫！谁谓此辈中无真情侠骨者耶？为述其事书之。

雅遇周郎顾曲频，感恩知己两情亲。伶君金尽缘歌舞，羞作吴王宫里人。

乍可春回淑气和，欢场几见醉颜酡。桃花流水情无限，精卫辛勤奈若何。

友人言：京伶冯三儿，大兴人。昔在王府大部，旦中尤物，以声技蓄厚赏。弱冠后，顾长突弁，遂弃业为掌班，而颌下亦于思可玩。班素隶贵邸，一日，主人以旦色未佳，仍命三儿充之。因剃须复业，而孙寿之态毕露矣。

脱却须眉复效颦，应缘曾现女人身。侍儿瞥见多相笑，仙子麻胡两失真。

施朱施粉事妖妍，顾影真堪一笑先。昔日欢郎多冷落，夜来惟有细君怜。

友人言：昔苏伶天保儿，姓陈氏，常熟人，在大成部，色技精妙，大胜今日魏、陈诸郎。即《拐磨》一剧，非长生所能彷彿也。以获罪遣戍新疆，而周其困穷，保其开释，不乏有力之交。惜其福薄而殒，闻之慨然有感。

断袖何如割臂盟，胥靡犹系故人情。未知仗义孙宾硕，肝胆曾为若辈倾。

友人言：苏伶张蕙兰，吴县人。昔在保和部，昆旦中之色美而艺术精者。常演《小尼姑思凡》，颇为众赏，一时名重，蓄厚资回南，谋入集秀部。集秀，苏班之最著者。其人皆梨园父老，不事艳冶，而声律之细，体状之工，令人神移目往，如与古会，非第一流不能入此。蕙兰以不在集秀，则声名顿减，乃捐金与班中司事者，挂名其间，扮演杂色。噫！为名为实，吾不能知，而其志则可嘉矣。

笙歌丛里早知机，莫俟门前车马稀。一棹江南烟水阔，舞衫何似绿蓑衣。

攀援声价附清音，名实难窥两可心。甘就经师执都养，应羞孔目擅词林。友人言：蕙兰之在集秀，如为实，则耳濡目染，其技日进，犹执都养役于经师之门；若为名，是监生捐孔目，而自诩翰林先生矣。其语甚新而确。

友人言：昔京伶八达子，系旗籍，在萃庆部。貌不甚妍，而声容态度恬雅安详。大小杂剧无不可人意者，一时盛称都下。于甲午年沃若而陨，今其名尚津津在人齿颊间。谱中不录，犹记旧院而无马湘兰，为歌坛一大缺限矣！余闻之有感，不忍以未见而弃焉。

歌坛豪客忆声容，名下诸郎未许同。乐伎即今腾众口，书生空愧老雕虫。

余作《燕兰谱》，惜杭伶乏人。符丈亭山曰：『廿年前京班一昆旦，为杭人，忘其姓氏。演赵翠儿一时独步，其它剧亦可观。』余忆丙戌秋，在桐乡与龙翔方丈让公观剧，一天竺僧谓余曰：『此班小旦作去声赵翠儿，真令人发渴』。让公有惭色。余曰：『阿师禅悟胜赵州茶矣！』相与大笑。今符丈所见，想亦发渴者耶？以乡人故附录之。

廿载歌场杳莫追，就中绝艺尚堪思。吾乡亦有风流旦，缓步传神赵翠儿。符云：翠儿途遇舒状元，与订婚后，数缓步最妙。

昔同让老近歌台，衲子忘机语不猜。解道翠儿真发渴，茶禅滋味个中来。

友人张君示余《魏长生小传》，不知何人作也。叙其幼习伶伦，困阨备至。已亥岁随人入都。时双庆部不为众赏，歌楼莫之齿及。长生告其部人曰：『使我入班，雨月而不为诸君增价者，甘受罚无悔。』既而以《滚楼》一剧名动京城，观者日至千余，六大班顿为之减色。又以齿长，物色陈银儿为徒，传其媚态，以邀豪客。庚辛之际，征歌舞者无不以双庆部为第一也。且为人豪侠好施，一振昔年委蕤之气。乡人之旅困者多德之。嗟乎！此何异苏季子简练揣摩，以操必售之具耶！士君子科闾困蹶，往往愤懑不甘，试自思之，能如长生之所挟否乎？然机会未来，彼亦蜀中之

贱工耳。时乎！时乎！藏器以待可也。

揣摩时好竞妖妍，风会相趋讵偶然。消尽雄姿春婉娩，无人知是野狐禅。京班多高腔，自魏三变梆子腔，尽为靡靡之音矣。

题桥宁让马相如，回首西州泪满裾。今日梨园称独步，应将佳话续《虞初》。

余近见陈银儿《烤火》一出，状女悦男之情，欲前且却，举多羞涩，既而欲念难消，肩背瑟缩，不能自禁，恍悟咸卦四五两爻，由心而背，一节深一节，非以胸为漠不关情处。讲家谓胸在心上不能感物，此春香之讥陈最良：『一些趣也不知』也。识者当自领之。

两美相逢悦有余，目矚肩耸更踟躇。顿教悟彻咸其脢，快读儿家无字书。

天香子寓中有豪客数人，留连半日，抵暮而散，酒后兼有朱提之约。次日家僮不慎，几乎致讼。有大力者以白简吓之，诸人始为敛息。而大力者亦负螳螂捕蝉之诮焉。余曰：『欧阳子云「酒黏衫袖重，花压帽檐斜」。斯时，军流以下罪名亦胡勿为是，可为诸人针砭矣。』

何来豪客事呼卢，雀角无端起点奴。惹得侬家狂措大，袖中倾出醋葫芦。

见说螳螂欲捕蝉，谁知黄雀已擎拳。欧阳十字真成案，酒底花间好悟禅。

刘芸阁，伶中之卫玠也，一巨公颇为醉心。偶于冯氏席间，见吾乡徐又次封翁言：『芸阁必为赏鉴。』告以未识。巨公为之骇然，以芸阁常至冯氏也，封翁大蒙陈最良之诮。又山阴俞六爱，居京已久，于歌楼见芸阁，深悦之，作诗赞其美，携以示余，误以『刘』为『柳』，所用皆柳事。嗟乎！斯二人者，今之人欤古之遗也。

苦思搜句赠知音，刚卯讹将柔卯侵。那似徐翁真洒落，桃花满树不关心。『刚卯』取卯金义，见《史记》；『柔卯』言柳，柳为卯，本性柔。『桃花满树』，隐用刘郎。

友人云：京旦之装小脚者，昔时不过数出，举止每多瑟缩。自魏三擅名之后，无不以小脚登场，足挑目动，在在关情。且闻其媚人之状，若晋侯之梦与楚子抻焉。余曰：『闻昔保和部有苏伶沈富官，容仪娇好，缠足如女子，但未知横陈否耶？若偶渔婢，当有可观。』相与大笑，诗以解嘲。『渔婢』，即渔妇跣足者。

似月如钩瘦影埋，竞夸娇媚试提鞦。风流莫问横陈夜，羞与嫋嫋读平声小姐偕。

明周宪王《元宫词》：『帘前三寸弓鞋露，知是嫋嫋小姐来。』按：字书，嫋，嫩、软二音俱仄声，今当读作平声。

友人言：蜀伶新出琴腔，即甘肃调，名西秦腔。其器不用笙笛，以胡琴为主，月琴副之。工尺咿唔如话，旦色之无歌喉者，每借以藏拙焉。若高明官之演《小寡妇上坟》，寻音赴节，不闻一字，有如傀儡登场。昔人云：『丝不如竹，竹不如肉。』口无歌韵而藉靡靡之音以相掩饰，乐技至此愈降愈下矣！

有丝无竹少清音，始自秦中带郑淫。莫笑当歌同傀儡，胜儿原是抱胡琴。胡琴婢胜儿事，见《中吴纪闻》。

友人言：近日歌楼老剧冶艳成风，凡报条有《大闹销金帐》者以红纸书所演之戏贴于门牌，名曰『报条』。是日坐客必满。魏三《滚楼》之后，银儿、玉官皆效

之。又刘有《桂花亭》，王有《葫芦架》，究未若银儿之《双麒麟》，裸裎揭帐令人如观大体双也。未演之前，场上先设帷榻花亭，如结青庐以待新妇者，使年少神驰目瞶，罔念作狂，淫靡之习，伊胡底欤？

楚雨巫云黯不开，好传消息到歌台。春风是处鸳鸯社，借问何人补缺来。昔人以新妇未来，房中先设帷榻，名『待缺』。『鸳鸯社』见《妆楼记》。

友人言：近时豪客观剧，必坐于下场门，以便与所欢眼色相勾也。而诸旦在园见有相知者，或送菓点，或亲至问安，以为照应。少焉歌管未终，已同车入酒楼矣。鼓咽咽醉言归，樊楼风景于斯复睹。

飞眼皮科笑口开，渐看菓点出歌台。下场门好无多地，购得冤头入坐来。俗呼豪客为『冤大头』。

友人有以『歌楼一字评』相告，嫌其于诸旦颇有未愜，乃以近时习见者为更定之。魏三曰『妖』以其开淫冶之风，旧评曰『骚』，未足以概之；银官曰『标』；桂官曰『娇』；玉官曰

『翘』；宜于健妇而少韵致凤官曰『刁』；白二曰『飘』；

飘逸也万官曰『豪』；郑三曰

『骚』；蕙官曰『挑』；三元曰『糙』平声。其它则未入品题也。至于昆旦，声容优劣

有不可以一字概，当仿书画评，各缀数语为善，姑阙之，以俟赏音者。

尹谢风流絶世无，聊将一字拟形模。歌楼尽日争娇艳，笑是缓缓九尾狐。

闻昔年，某伶于戏园遇一贵客，邀往酒楼，赞其色艺之妙，命仆携两元宝赠之。叩其寓，不告，云是粤省太守来京补观察者，不日即出京，毋庸往还也。次日，伶在别园，其客亦至焉。复招饮，赠银如前。将别，伶固请某日过寓午饭，其人沈吟再四，嘱以不须多费，只一二肴叙谈可也。是日，其人盛从而来，持赠千金，抵暮欲去，固留宿，乃遣仆返。曰：『明日不须早来』！伶延入卧室，与谈甚洽，凡箱柜所有悉告之。更余，举家皆寝，二人尚喋喋不休。次早家人起，见门牖箱柜俱开，惟伶独卧榻上，唤之迷闷不醒，亟以水解之，乃觉，方知为盗席卷踰垣而去。余曰：『斯伶亦盗也，以盗捐盗，讵知彼盗之巧哉！』

两贼汹汹今日逢，青蛇有意敌黄蜂。温柔乡里迷魂阵，可奈强良穿我墉。谚云：『青竹蛇儿口，黄蜂尾上针』，皆毒物也。

岂是千金怜季布，谁言一饭重王孙。巧偷积岁逢豪夺，剩有余欢绕梦魂。

金陵富商某者，于癸巳年在京捐纳别驾。初时爱玩玉器，无他好焉。不数月，于戏园相识二人，俗名『拉纤者』，招伶来寓，日引日多，家人以二鬼目之。于是富商豪情顿起，酒肴车马，率以为常，昼则歌楼酒馆，夜则豪饮呼卢，每晚必留一旦在寓同宿。继为娶亲买屋，衣服器具皆备，一人不下千余金。凡五阅月，已为三人娶矣。都中之资既竭，复往家取。其子来京，劝以南返，不听，而阿堵物不能裕如也。后一伶索三百金，期彼数日，不能如约，其人在寓门诟詈，即前所与娶妇者。商闻之怨悔羞忿，至夜而缢。约计不及一年，所费万金以外。其子欲讼之官，乡人劝以勿彰父过，为之吞声隐泣。嗟乎！谁实致之？皆二鬼焉！居长安道者可不慎所交哉！余闻之富商之邻，为所目击，因讳其姓氏，书之以为殷鉴。

大鬼昂藏小鬼嬉，招徕狐兔逐人迷。尊前听说金陵贾，一载春风化雉鸡。

狐媚依人似漆胶，狼贪藉物等营茅。与君拂拭轩辕镜，莫为金陵作解嘲。见隋王度《古镜记》。

余十载京华，薄游歌馆，于白二之外多不知其姓名。姻娅赵君来京一载，凡出名之旦无不识之。余问其故，曰：『见好花而不知名，可乎？』是诚深于情者。余甚愧昔之卤莽也，聊以禅悟解嘲，而燕兰之咏，于斯渐入花丛矣！

十年歌馆愧匆匆，访艳应输天水翁。何似拈花成一笑，不教色相落胸中。

世事何劳问假真，人人竿木自随身。年来我亦登场客，惭愧诸郎格韵新。

杂感共一十八首

余自癸卯至今，有所传闻，形诸歌咏。姑以得诗先后録之，无有伦次，亦不计其工拙也。

曾闻侍史缀征衣，结契王郎世所稀。莫讶春光三月暮，红深颔下燕初肥。

歌台狂客起风波，鸡肋难容奈若何。解借公猴通一笑，漫劳司马奋投戈。『公猴』，明妓朱斗儿事，见《青泥莲花记》。

江东只子美无瑕，匕首难逢陆押衙。刎颈交情何惜尔，祇愁误唱《后庭花》。陆判官换美人头事，见《聊斋志异》。

避君三舍礼逡巡，郄笑先生见未真。待得啸梁频作恶，短长难禁路傍人。

三寿云亡泪黯然，阿谁娇好慰情牵。刘郎自是秋风客，莫道长晴不雨天。

艳阳回首即残春，浪絮浮花卷作苹。羞对浔阳江上妇，琵琶何处嫁商人。

仙史言欢忆艳歌，黠奴凭借起风波。无端嫁祸虬髯客，和尚差哉会也么？姚广孝贵显回苏，往视其友，闭门不纳，遥应之曰：『和尚差哉！』

修真学佛语惺惺，欲海波澜棺未宁。莫被秦宫花里笑，戚施面目太酸丁。

漫说天怀同柳下，鲁男今见几人存？道旁苦李何堪摘，也作酸梅沁齿痕。

余桃已失分甘爱，断藕犹牵别绪长。奚似杜陵沔燕侣，去来亲近两相忘。

家世曾传八咏楼，酒垆饼肆见风流。狂奴气概犹堪取，争似谀文媚沐猴。

水绘园中迹已陈，拏芳图上又生春。泣鱼固宠纷纷者，几见流芬齿颊人。

撒瑟辰悲欲见难，愁容黯黯泪洊澜。床头玉匣休教殉，好付云郎画里看。

倜傥风流迥絶羣，长卿才气欲凌云。可怜一握刘蕡泪，羞谱新声《白练裙》。《白练裙》院本，明郎之文作，以调马湘兰者。

美人香草本《离骚》，金屋由来贮阿娇。珍重玉郎身似玉，艳情绮语写丰标。为芸阁赋

名士缠头翰墨香，诸郎身价藉文章。湘云赋后桐花赋，更有新诗到海棠。海棠诗者，为碧綠作。

豪情日日醉歌楼，佳话欣传若置邮。何似含毫清兴远，生香真色写风流。

泮兰沅芷总芳芬，漠漠湘波冉冉云。自我西郊密不雨，管教渴煞两参军。

癸卯端阳之后，伴鹤携扇一匣，嘱友人画兰，分赠诸伶之佳者。使宋朝之美，服燕姑之香，可谓一时韵胜矣。余以燕兰命名，盖仿于此。嗟乎！倚翠偎红，浅斟低唱，人生行乐耳。能适其乐，而同海客之狎鸥者，其画兰主人乎？是则余之小谱亦等诸雪泥鸿爪也。

披拂熏风写翠颜，芳香满袖落人间。与君妙选如兰契，漫说亭亭玉笋班。

北地胭脂澹欲浮，都含芳韵媚歌楼。先生好作《燕兰谱》，嫩白娇红尽解愁。

东风一曲紫山翁，旖旎无妨学道功。歌舞情怀聊漫与，任他人笑比顽童。

汲古綠深两眼寬，何来尤物可盘桓。忘机鸥鸟无心客，偶尔相逢也足欢。

《燕兰小谱》卷之五终

●《燕兰小谱》跋

安乐山樵《燕兰小谱》，凡诗二百二首，始癸卯重午，后暨今中秋所作也。予昔假馆于兰修丁香老屋，见湘云昼兰，索山樵同咏。山樵更征诸郎之得名者，悉直品题，缓吟低唱，以抒写其沈郁无聊之慨。特借径诸郎，故不必人求其备。诗惟其肖，其中隳永风雅，感慨调笑，得风人比兴之旨，而神韵直逼渔洋。盖其一片婆心，欲挽淫靡而归于雅正，非董爱江维扬《竹枝词》比也。山樵每脱稿，必示予击赏，已非一日。爰书大略，以贻同好。读者得其味于酸盐之外可耳。

乙巳小春月竹酣居士跋